

四庫全書

集部

欽定四庫全書

雪山集卷十二

宋 王質 撰

賦

問北鴈賦

波漉漉兮江平上有楓兮秋清聆極浦之遙聲曰此豈
鴈之初征上手敬勞征行良苦大荒多霜長河多風背
河而南川原蕭條無食可充幸而至于此也既勞之且

訊之曰燕趙之野土梗俗勁慷慨大呼前無白刃齊負
東海魯挾龜蒙士辯而智譚高氣洪三秦以西狎武喜
功今皆弗聞為有為無以為有耶固未有奮精忠之烈
建殊效于中都者也以為無耶山川興氣星辰定區奚
獨于今而變于初言未既若將緩翼俛咮垂吐復吞未
及有言又進之曰凡汝所經與汝所知比屋赤子為喜
為悲飢兮何食寒兮何衣故老遺民為亡為存城郭苑
園桑麻草木為仍其生為一掃而更山兮崇崇為陷而

深有淵其谷為堞而平古帝園陵繞牆崇扉為雄茂而
森肅為寒涼而慘悽秘殿崔嵬邃館沈宮為丹青兮不
改為荆榛兮灌叢異芳名英瑰竒怪石為形貌之猶然
為蒼莽而不可蹤跡也吾惟汝問幸告其故勿簡而疎
勿誕而誣于是哀鳴咿嚶若避若趨倏飛去兮不可追
黯落日兮平蕪

綺川亭賦

苕溪之北有山曰貝錦之山並山而西有亭曰綺川之

亭仰睨葛仙之丹鼎旁招卞山之白雲王子愛之坐見
于牆食見于羹夜航溪而十往返晝履山而百降登客
有問焉者曰造化治形耳目分職耳則司聲目則司色
彼聲色之無有顧耳目之何得胡乃廢寢興輟飲食墮
目于窈窕之境喪耳于默默之域王子曰子嘗覽于綺
川之亭乎曰未也綺川何如王子曰子欲聞之乎曰然
然則為子言之綺川之上巖穹谷淵青松魁奇翠竹淨
娟絡以蒼藤激以飛泉聲如應和上徹雲天百鳥吟呼

或高或低或僛疾而激烈或清深而逶迤如天球大鏞
並作于庭笙以小雅之南陔歌以召南之采蘋綺川之
下洲渚參差綠水紅蓮汎兮相依露濯而清風搖而馥
月麗而皎煙蒙而奇白蘋青藻前導後隨屬玉鵝鵲戀
不忍飛如洛水之浦巫山之陽戴金搖兮熠耀振文佩
兮颺颺此其大略也故曰不律呂而聲者天下之至聲
也不黼黻而色者天下之至色也且有喜而無憂有利
而無害有得而無喪有成而無敗今夫洪震纖響銷神

奪精命之曰伐命之兵豐頰長眉秀骨鮮膚命之曰銷
軀之爐非獨聲色而已美酒甘餐溫醇濃渥命之曰腐
腸之藥縟衣還裳縻曼繁鮮命之曰沈躬之淵子亦知
之乎于是客俯而思仰而歡曰嗚呼殆哉客與夷猶而
戲虎狼禹行舜趨而涉瞿唐然則流蕩遁逸清宮洞房
眩曜恍惚蜀文吳章邪氣湊襲正氣蔽藏精魄紛紜若
有若亡日盛月新乃溘而僵嗚呼殆哉向也吾見子之
陋今也吾見子之高小人敢不敬再拜受賜

雅

樞相宣撫虞公壽雅并序

乾道三年丁亥十一月壬子二日丙寅仁壽虞
公生之日壽雅所謂作也私慶也曷以雅大賢
之生天地有運陰陽有數星辰有度鬼神有謀
闕于天下大也曷為大宗廟有依生靈有歸禮
樂有託道德有宗其為大明也崧高之詩曰維
嶽降神生甫及申烝民之詩曰保茲天子生仲

山甫誦其人本其生非以其躬以其周也故曰
維周之翰又曰天監有周私遺也曷以雅嵩高
之詩曰以贈申伯烝民之詩曰仲山甫永懷以
慰其心禮則私情則公也曷以為公天生烝民
好是懿德民之彞也無諄于古無浮于今某無
尤焉維是有豐茂之德而無肆好之心有恢宏
之功而無穆清之章此則某之媿也

漢清

漢水之清其石粼粼仁壽公來思漢水則清
漢水之蜀其洄澳澳仁壽公往思漢水則濁

農耰于野不蹂一苗賈馳于郊不驚一毛公在襄陽民
生逍遙

公來自東襄民齎齎止公毋西

公來自吳襄民慼慼止公毋蜀

金我襄城湯我漢江春我之筐秋我之箱

我耄皤皤公昔年之而曷捐之

我孩嬰嬰公昔體之而曷置之

日月蹉蹉勿驚公色霜露烈烈勿華公髮

公髮勿華我生則遐籲彼蒼天佑我皇家

江艦

江之沄沄艦之賁賁敵之休休震于崑崙仁壽公一臨
靡靡其傾

江之洋洋艦之揚揚敵之煌煌孔熾厥芒仁壽公一噓
蕭蕭其涼

天子在宮有恫悵悵神主在廟有震爰爰暨我國人以
莫不惕

在宮雍雍金石其音在廟湛湛虎兕其扇暨我國人以
莫不寧

在庚之寅維公其生在巳之辛維公其成而有斯厄而
有斯人匪天之私伊宋之仁

大江之濱采石之津波之淪淪石之粼粼謂公可堙江
則可塵山之嶽嶽隰之昀昀謂公可磨山則可簪

五言古詩

故事三公皆黃閣作黃閣辭

文章開紫垣委耀照黃扉崇雉抱高墉長虹曳華櫬浮
閑翼交楯戟衣搖縹粉石紋浪花碎紫光射金鼎珠璣
明黼領劒鏢玉螭冷槐香吹鬢影相對青炯炯

故事相國金印紫綬三公亦如之作金印辭

寶篆結金紋玉皇衣上雲飛馳雙日月開閉幾乾坤靈
夔挾輶吼幘弩指幡首絳霏密蔥蒨隱隱龜銜紐祥文

寫天影壽骨聳嶽頂蓮巢秋風冷甘守相國印

永興丞以皓雪鮮梅奇語見示戲占閒人浪辭酬
之

四海一山玉切作冠巒冠上戴明月履下踏飛湍肺
腸裏林壑表裏交珊珊上界雪可飽下土人希餐三春
鎮長在九夏何曾殘大千蒼蘆林巨萬梅花團花惟白
皓皓巾自烏漫漫純玉龍爭飛雜玉龍皆蟠千丈亭不
歷九尺庵隨看

沈存中有觀雪庵
其制在忘懷錄

摩雲起高崖運斤吾

能刊書空結奇字擘鏡誰能觀須彌有數盡此興無時
閑

聞雁

我性愛風竹歷耳如箎弦兩日偶不聞但見青摩烟半
夜意展轉時聞雁翩翩未能叫雲月而我獨不眠抱被
夜徙榻空堂秋山連亦有鷗鷺栖歷歷鳴更傳為汝飲
一杯問汝以一言不居蘆葦中乃巢蒼翠巔蕭蕭西風
多一等菰蒲寒遠來有相伴汝等豈不賢不覺點急急

難通意惓惓振翼忽飛去江湖水連天

荷柳松竹贈答

并序 案此詩當是孝宗淳熙八年所作

王子景文蕭散人也涉暑即旁求水石茂林嘉木攘之惟饒閒故此念多酬其所得不貲矣權興起辛巳推遷至辛丑逾二十年營巢寢就緒全體山僧道人之廬非火宅也或者野之麋鹿山林自本性豈故為崖異者耶有荷有柳松竹兼之歲久成魁幹成厚陰于素忌稍銷雖趨此

門微有所省變熱惱為清涼亦無情而有趣者
助也一日偃仰竹榻酬酢湖風意取故書繙之
見香山雞鶴贈答凡二玉川客石竹贈答又加
遜章凡三香山有競物之心焉玉川則展轉推
卻避世而離俗者也寧為盧勿為白戲效其體
為之然不全規摹亦在我者咸隨人焉難也小
異何傷乎

僕贈荷

僕贈荷吾友清陰多為我生涼飈寒輝相盪摩姑徐徐
勿急急歌爾綠玉盤傾爾白玉粒

荷遜柳

荷遜柳短茁非脩莖焉如子妙密騰起敷層陰明月上
子勿障主欲務遐觀清宇任昭曠

柳遜竹

柳遜竹弱植短竒節憂玉仍鏗金難攀子清絕主睡酣
毋驚醒遲主江湖歸相與獻清影

竹遜松

竹遜松古氣摩空纏鐵石作風骨可以班主賢虛空中
走河海主不好世音子盍宏天籟

松答僕

松答僕奉主願盡心護以虬龍威娛以金玉音作炎夏
作凜秋願主愛玉體五夜增輕裘

和張晉彥

白草蒙荒烟江南似江北游子無故鄉去住總為客平

生不如意江閣見面窄相逢酒一杯意氣感知識

和郭從範二首

羽檄傳歲月走馬不當疾我家在江南時節阻會集東
臯冗不治杜老趣歸急何時秉犁鋤夜翻隴頭濕

萱草搖清風榴英燄方午新燕披紫茸低昂子隨母暄
寒換時節濃疎變庭樹杜老癡不歸空憐小兒女

七言古詩

初春

癡雲漠漠低壓屋雨意垂垂篩似粟半夜春聲到幽竹
方槽溜溜瀉寒玉夢破簷牙聲未乾開門山色青攢攢
東君放步到籬脚桃李稍稍敷春妍既雨即晴應更好
將及清明藉芳草廟堂老手調陰陽故應隨意為雨暘

留別陳阜卿

巍巍堂堂陳豫章身長五尺名八方千鈞寶鼎薦禘嘗
百圍大木宜宮堂迺者從之在建康挾雲望見奎婁張
一言拓我萬里疆眇視六合揮八荒震震雷電飛清霜

羣靈錯漠無晶光天駟超逸奔絕韁撓擒斂旗彫赤芒
鴻鵠之上日月旁翩翩孤影搖蒼茫大兒太史公子長
小兒元和韓侍郎夔龍稷契伊傅姜青天白日雁成行
眈眈我負千鍾囊置在公前一鉞鉞東齊南楚服晉強
而况胡沈梁江黃今我不樂思還鄉石頭渡口呼歸航
不獨別離多慨慷時事關心神轉傷一為公歌臣馬良
黃塵蔽人聲不揚公何時予歸廟廊土囊風怒於菟驤
煥發海藏龍宮藏滿朝桂朮參芝香三瀦三釁我冠裳

隻輪小車兩僕將不然扁舟下瀟湘參差孤起橫滄浪
復欲淮南耕戰場傍鋤春草臥斜陽惠山樹石極蔥蒼
儻來相對高僧房

送趙希鄜

集英殿下識乃翁遺愛樓前又識儂參差兩紀短一載
伏想鬢髮秋蓬蓬道阻且脩不可見何喜老兄相會逢
老兄顏色清而丰娟娟秋水開芙蓉鐵甕城頭拭硎刃
晚榜咫尺春旗紅觚稜金爵面成背半帆楚月迎淮風

相思江西子王子尋盟來與白鷗同江莎濃澹俄一再
庾樓卻倚廬山峯吾宗乃有此豚犬掩鼻急趨風露中
老兄久厭臭來逐是行不復塵相蒙亦欲柁牙把船尾
琵琶洲上攜手吟青楓

陪林守遊南湖月下歌

紫霄峯頭雲破湧明月翠華洞裏烟冷生清風水光上
下相映碧小舟飛入玻瓈中荷露白凝珠蓼花紅綴米
沈沈水晶宮金波幾千里君不見風流太守醉似泥倒

著接羅騎馬歸南湖風月君不知問君何似高陽池翡翠杓金叵羅勸君一杯酒聽我南湖歌清風明月萬古長如此有酒不樂將奈何

和袁丞海棠

海棠不入草堂手

見韓子
蒼詩

雪堂乃與同春風

見蘇子
瞻詩

草

堂雪堂各千載唐朝宋朝無兩紅露霏風嫋非人為

見蘇

子瞻詩

夜染朝酣自化工

見張建
封詩

大洋之內烟濛濛不似

周公禮樂中

見花木記花以海為
名者悉自南海來

墨梅

貴簡不貴繁妙在有無間滿眼尋不見約畧見纖纖貴
老不貴稚妙在榮枯際芳態減初年其中寓幽意貴瘠
不貴肥愈瘦愈清竒瘦到無何有政好翫空枝貴含不
貴開風度韜胚胎游蜂啅不得乃始抱全才宜在幽且
邃終日無人至水繞山重重隔樹令人嚏宜在平且闊
大江驚濤潑潑上稍連顛半驀忽衝脫宜夜不宜晝更
宜月波溜崖淨澗淙淙漁子推篷嗅宜陰不宜晴更宜

雪花凝五七點未足封枝要全扁宜與竹相鄰白白參
青青所恨花無音間借竹為聲宜與松相伴扶疎交凌
亂松香麤則麤亦能佐一半其鳥宜翠羽否則碧蒿侶
山雀仍山鴉速去切勿駐其人宜野僧否則閒道民宜
疎綺紈客公子共王孫吾非僧又非道兩眼貯五湖兩
肩負三島相煩健筆凌風掃梅子王子成二老

龍珠吟

蛇有黃雞有錦蚌有珠魚有枕萬物隨身各懷寶惟龍

抱負超覆幬臆之上領之下聲靈氣燄焯光輝威力神
通宏變化小徑寸大圍尺口中皎月戲吐吞掌上流星
恣拋擲存此珠千年萬年鱗不枯亡此珠一螻一蟻血
可濡有水即珠榮無水即珠悴有雲即珠騰無雲即珠
墜太陽真火力能鑠飛天夜叉勢能制所以多潛巖壑
睡功成行滿自在飛天旋地轉皆由之如人賢愚有九
品如人貴賤有十威三尺烏勿能啄大力鬼弗能搏開
通萬類總圓明照耀十方齊廓落珠正有珠忽無猶存

一念著恡惜即入三界纏空虛丹霞燒佛獨玩珠闕南
打鼓喜獲珠韶山心珠本無色大海龍珠同一如乾六
爻龍六變潛見躍飛以次升飛上九天須一轉亢有悔
在上九見無首在用九藏威在首不在身若到無時竟
何有祇園佛闕里翁下土雖分兩聖域上天同是一真
龍

起伏龍行呈張元亮

使君寸丹通九淵冷徹龍膽驚不眠掣闕稽首玉帝前

青霓影裏一粲鮮羣龍下走如奔泉電旗掀舞雷車旋
怒蛟騰起纏陰涎四海五湖歸一髯黃塵白沙飛滿川
頃刻變作聲潺湲何人此手有此拳斂散風雨麾雲烟
一州千里十萬塵翻覆歉歲為豐年雲花繚繞金連錢
使君倚鞚將朝天千珠萬玉傾箱圓夕陽捫腹秋風邊
此時可懷不可瞻何不留取黃金鞭

異蛇

非蛟非龍奚為耶杳靄是蛇或非蛇軀如三丈中廬棟

聲如二尺單夫車洶湧西來復南去激碎滿川波浪花
爾等陸產殊水產亦有水產非其家平生康莊在管莽
胡乃出沒同魚蝦無何變化不俄頃野鴨凌亂揚風沙
向來鱗甲渺烟霧但見浦溆連蒹葭立憑石樹踏莎草
隄前隄後聽蝦蟇南山之趾西湖腹是日有物橫空拏
一爪二角色純黑亂雲奔走相谿訝得非此物即此蛇
是否恍惚空喧譁虹腰餘飛雨腳斷夕陽半閣西山斜
登張安國右司官舍後閣

東風吹塵暗城郭一見吳山增眼明文人筆力轉嵩華
坐撫吳山毫髮輕向來嫵媚玉局老對公談罷猶縱橫
參差萬象羅雙目奔走文場供約束東家梁肉西絲竹
卻與青山作僮僕

和游子明效李長吉體二首

江楓搖落秋吹清吳波夜澄孤槩橫白蘋花老浪紋淺
的皪背荷雙鷺明烟嶼雲岑楚江遠三更夢歸五更返
斜陽影外遠山稠千里不遮南望眼

樹頂參差山髻青
漫漫秋浦無人行
征衫塵土老歲月
梧桐秋風桃李春
水寒露冷蒹葭濕
屬玉橫江孤影直
波紋搖盡九秋香
菱葉團圓水花碧

聽譚師彈琴

君不能百步洪中裂橫竹
一聲吹入秋天綠
巨魚鼓舞碎明珠
白浪軒昂動浮玉
又不能多景樓上吹飛鴻
哀絃欲斷滄浪風
徘徊舟子駐不進
江妃出聽烟溟濛
不知何處得此薰風琴
元龍六尺含蒼雲
恐是嶧山孤峯

絕頂上萬歲不老之寒根道人兩手提天機中有妙法
無人知風顛雨急倏來往雨收風定游絲飛欲下不下
窺魚鷗忽前忽後回波舟恍惚浮雲捲天宇錯落萬點
飛星流世間萬法總非真況此假合非天成匣琴不出
手無聲袖手不彈琴不鳴此琴此手兩無與問君廣陵
賀若從何去王子有琴誰復傳無徽無軫亦無絃若人
解得非耳聽為君試作無手彈

題觀政池橋

案此詩及游楊氏園詩當是孝宗
乾道四年六年質在蜀時所作

西徹秦川東劔關十有六州無間言威聲浩蕩流東南
與大江水同發源節麾毳毼繡衣鮮剛風吹上九天門
手從瑤宮掇明月貯在官池水不渾菱葉荷花淨晚晚
春鋤屬玉來頻煩冷光烈烈射地骨魑魅辟易聲煩冤
牛腰抱去鳬行速來瞰皎潔聽潺湲玉龍蟠底抱奇寶
獠奴試可呼崑崙洞庭青草似天闊灩澦瞿唐如馬奔
不如我池有幽致寶奩平開秋露洗高人未到已神融
俗客若來應潁泚

遊楊氏園

幽芳秀陰似琅琊三四牛鳴通浣花少陵醉臥元不死
強請起來殊更佳向來娟娟隔秋水誰與為期同在此
德星分野到楊家亦有致然非偶爾蕭蕭騷騷詩韻寒
膈膈膊膊碁聲乾澎澎湃酒波卷便便旋旋茶眼翻
是日成都極炎熱此堂陰風下濃雪談端天地不支吾
筆下龍蛇爭撇捩所恨江南在天末隔天鴻鴈難同飛
彭蠡洞庭隔烟水他日豈不懷此時他日安得如此時

楊家壁上更重題

贈沈文伯

沈公頂踵皆詩書如大國楚吞江湖平生瓊瑰三萬斛
化作木鐵來侵膚霜臺栢葉夜驚耳大庾梅香春染裾
世間萬法等一觀寧知憂患非歡娛三賢堂上一杯酒
風流未減承明廬兩星熒煌耀南海化州老沈儋州蘇
知公久閑談笑口忍啄三尺不敢呼孟公故是大度士
豈受譴譴繁文拘一朝青天返白日冰山轉眼成空虛

秋鷹下韝馬脫轡逸氣凜凜橫天衢蠻烟不折壯士節
詩卷已作牛腰麤貝宮瑤胎貫月魄僊掌露華沈玉壺
酒酣妙語一咀嚼舌根沆瀣如醍醐歸來清夢渺江海
波濤一葉凌菰蒲十年故紙倦翻覆見此喜氣生眉鬚
何當杖履奉君子看公快掃青松腴

復和前韻

小牕厭讀牛毛書徑思一葦航江湖英英山色著眉宇
炯炯波光明髮膚清風蓑笠明月棹為我洗濯塵埃裾

功名暫寄癡兒手烟雲且與閒人娛浴鳧飛鷺總相識
近水遠山俱可廬東遊會稽略滄海西跨震澤窺姑蘇
小官趨事苦奔走大官憂國多嗟吁幸今未掛衣冠籍
浮家泛宅誰能拘天朝多士森列宿氏房奎壁牛女虛
如公第一等人物故應策轡飛雲衢得印安用如斗大
握筆會使如椽麤玉堂靜夜掣鈴索臥聽宮點鳴銅壺
日閒剖茗碎鸞鳳霜清把酒傾醍醐記取江南子王子
溪邊共立春風蒲及今未趨紫宸列尚容時挽張公鬚

奚奴剩背古錦囊與公痛咀溪山腴

又次韻

眼前事事皆可書秋葉滿江烟滿湖霜風細織紅錦幄
露菊洗出黃皮膚山南山北躡飛徑步步藤梢牽客裾
褰裳飛下蒹葭浦紛紛鷗鳥來相娛漁火深明隔橋浦
炊烟出沒臨溪廬溪山洗斷鴛鴦夢犀簾不憶錢塘蘇
百年日月走雙轂萬古興亡同一吁角鷹肯戀繡鞵穩
野馬不受金羈拘功名貴富兩安用烏有先生并子虛

不圖操筆賦清廟但思擊壤賡康衢何時再踏故山麓
芭蕉長大檜栽麤夜疇娟娟濕翻露春林聒聒聽提壺
魚肥不用去熊掌酒濁正是勝醍醐一區春雨熟瓜芋
半溪秋水繁菰蒲侯門亦復憐稚子下狀不敢勞長鬚
吾生一飽足已矣豈復過意求膏腴

贈戴漁

李氏小房何必廬顏氏心齋自有書吾衰久矣不復夢
子歸求之師有餘千春杏花開闕里萬代風聲吟舞雩

靜聽猶聞喚回也驚起不覺呼參乎茫茫空裏撮不得
歷歷箇中殊不疎一點外皆閒事業三聲中有大工夫
莫欺山東老王質撥醒江南窮戴漁若逢有眼但舉似
漫敲此骨真何如能于靈府鑽三寸敢許孟門增一徒
清風各自在何處明月相看元不孤他還見汝不見汝
定是故吾非故吾

用和游次公韻贈慧璉

行到山深山愈青山青水青青照人水光易晝而難夜

山態雖秋而亦春魚窠在水不知濕鳥翮憑空能自直
霞綺橫飛總是紅浪花纔起渾無碧

再和示璉

秋林秋葉無全青手先把者山中人獨秋風早來到
寒食清明隨立春倒飛斜日光不濕吹斷長虹影皆直
娟妙全存慘淡中一寸不如一分碧

倦繡圖

短屏小鴨眠枯葦徘徊略住西風指佳人手閒心不閒

腸斷吳江烟水寒淒淒空庭晚苔濕冷篆青烟半絲直
卷簾寂寞滿天秋惟見孤楠一株碧

送羅君

舉首黃龍山色青琤琤乾葉墜寒林門首平塘泊鷗鷺
吾與若曹都眼明海會幽銘掩清漢雲巖豐碑掣奔電
一甌花乳一爐烟投地起來俱不見

送張監稅歸去來歌

君不見義熙元年陶彭澤偶纏禿綬稱長官俄颺輕舟

作歸客蕭蕭五十年
袞袞八十日縣令
雖為百里君不似
斜川臨流玩泉石
公田雖收半頃稅
不似東臯種禾滿
阡陌後園之柳為
我貯清陰東籬之
菊為我發佳色濁
醪妙理汝不知素
琴真趣吾能識陶
隱君張公子千二
百年同一軌丈夫
意氣當如此亦不
掛冠神武門亦不
還笏蓬萊陞盡展
平生履歷書凌亂
雲烟飛滿紙歸去
來歸去來二君覺
處真奇哉孔賓半
夜呼將去李愿終
身喚不回子休矣
子休矣取舍行藏
都在已一往一

來聊爾耳人生起滅半天雲世事浮沉一江水腰間帶
不須束頭上巾還可漉南山荷鋤夕露晞北牕支枕涼
風足酒具遮留栗里墟籃輿輕適廬山隅行將過且躊
躇溪山雲月無今古試訪淵明舊隱居

送趙師耳

東風吹了落花天芍藥酴醾晚更妍典衣換酒正吾事
不辭顛倒春風前胡為便作輕離別再拜忽成千里隔
東君憐我太蕭條啼損黃鸝留不得我欲拖筇隨馬尾

飽看廬陵好山水自憐憔悴縛江干去住未能隨意耳

贈黃君

君見雪山譚晦菴晦菴南北隔山川有命歸來如二老
不然隱去自三賢晦庵今年登五十鬢華未改目光力
徘徊吳楚已多年晦庵不急蒼生急君行車馬衣冠衢
亦有晦庵相似無君臣慶會第一格晦庵何日何時須
橫渠雖沒尚可作平生此事喜商略君當長跪問橫渠
子細平章句教錯大江朔風多湧波上江下江且婆婆

古時賢士一時有奈此庚辛甲乙何

黃君來過談士大夫甲乙及晦庵為

詳所從之游者如此不凡可卜也君子通老端明為族孫故有士子風格云

案朱子年譜生于建炎庚戌此

詩當是淳熙六年巳亥所作

寄題陸務觀漁隱

案此詩當是淳熙七年所作

乙酉務觀貳豫章書來告曰吾登孺子亭見子

以詩道南州高士之神情奇哉吾巢會稽築卑

棲號漁隱子為我詩之蓋自是參差契闊相望

動萬里又十六年務觀部江西治臨川又以書

來驚嗟然諾之爽乃亟為之僕未嘗渡浙江安
得識漁隱且久不見務觀弗克問其何如故寓
諸夢以為之辭然心目皆往來于此常弗忘也
寫真小軸偕之置在漁隱之旁與觀谿谷雲月
之奇所作其語鄙其容陋塵埃名勝之區為山
川之神所卻或使周旋其間亦未可知也昔寄
語他壤多矣未有以傳神俱者也此段風規自
王景文始

漁隱漁隱在何方海門潮白江沙黃吾嘗袖手江之旁
西興草樹烟蒼蒼欲往從之道阻長波濤澎湃不敢航
仰觀河漢翔鸛鷖安得與之俱頡頏得非蘭亭會諸王
清湍茂竹聯崇岡無乃鏡湖留知章蘭蘅風露生寒涼
不然此地何鏗鏘宿昔名勝沈光芒俟今焜耀名方昌
恨不登時到侯鄉循牆三匝徐升堂觀山觀水觀松篁
以及魚鳥同徜徉而俟南益仍西涼青霄空闊橫參商
無繇交臂咨其詳鴻雁同天不同行愛而不見魂飛揚

夢從縣圃周扶桑逢迎跪揖如平常齒牙砰磕搖風霜
秦漢魏晉周隋唐江河滾滾傾興亡指畫所隱聲琅琅
歡喜奇特不可當繼以驚愕懷惘惶倏忽烟霧輕騰驤
徑跨越嶠超吳瀧秦碑禹穴稽山陽隱約中有神仙莊
申椒菌桂連沙棠江薜薜芷多同芳春風澹沲秋風香
木蘭冠佩芙蓉裳杉烟竹月無時荒白蒲青荇春悠揚
秀似黃家雙井塘雄如蘇老峨嵋江冰壺雪甕涵瑤漿
夢回空闊嘹天篴縹緲羽客蹇雲縵清都飛露寒侵腸

涕唾塵窟掀翻牀俟其與世毋相忘且為清明開吉祥
蒼生環堵棲平康是時桐渚尋嚴光否則孺纓濯滄浪
不然楚竹然清湘下乃汀花靜鳴榔間騎麒麟翳鳳凰
玉京羣帝參翱翔吾在風埃渺相望大千世界空茫茫

贈楊溥

豐城何以多英賢老杜曩有浮雲篇名季友者天下傳
與吾偕出緱山仙豫章尚有豐碑堅萬古千秋不敢鐫
卻距季友五百年星辰不滅同其躔致君逸氣常蹕蹢

風后力牧參吾前往往劍氣騰衝天季者太阿仲龍泉
斗牛河漢光相鮮雷煥安得知其然西山北巖埋蒼烟
不及華陰玉井連延津雙虬終蜿蜒恨我不識張茂先

精神胡為暗式乾

案此句意義未甚明曉攷晉書張華傳有式乾殿進諫事殆謂華既得豐

城寶劍仍不能自顯其精神于式乾之議耳

溥也疎骨麤繒纏叩門剝啄音

清圓詢之與我生相聯同在豐城南北塵五行七曜難
拘攣瑤環沈隱塵埃邊高談雄辯波潺湲樓身縮手不
敢揎揚徐李呂紛蘭荃雲溪獨造珞瑤淵此曹可收不

可捐康莊固有英豪潛溥也可惜真酸寒沙頭靜鷺清
聯拳松梢野鶴飄孤蹇合在林壑栖空禪否則江湖烟
雨舡二者汝亦難當焉斗米三錢汝萬錢菜根墮葉如
凝羶他時六版無兩肩枯蘆半席汝亦慳我亦自笑骨
迤邐有時揮麈敲哀弦汝談我命五者全略與庚午相
周旋我忽大笑汝失言魚水若得庚午權豈肯草草為
江南功成名遂飛翩翩不作子房作仲連澤州叔寶令
人憐長跪告別趨吳船無餅無鉢何論氍毹稜金鏡射

玉璫有見問者勿面謾但實告之灰不然別有一路非
人寰王顛來處從溪顛狐踪不入象王圈驢乳難霑獅
子涎臨濟飽受黃蘗鞭三鞭躍上層霄顛一喝一踏成
平原後來三傑勤演端佛日霹靂天闕三足搖驢兒八
角盤駕雷驅電馳奔湍明月堂中一覺眠何時法鼓聲
闐闐今其去兮風方顛大江茫茫雪滿川蓴鱸興盡撐
西颿倘欲見我江淮壩不在廬山則祖山

送施丙卿

案此詩當是淳熙七年所作

嗣宗仲容天下無施家更與阮家殊舍人騎星上天衢
令君抱雲守仙都氏房奎壁牛女虛豈肯使人清暉孤
舍人桃李將吹噓青青白白并朱朱子昔綠水敷紅渠
速謝香火歸諸胥元豐歐陽元祐蘇黃晁張秦皆其徒
子所標準前規摹策勲豈不真良圖甘王樓下百日餘
展盡胷襟渺江湖今年大燎然洪爐獨此冰玉涵秋菰
玉山玉水清而腴山南山北多仙廬居仁寶玦敲珊瑚
吉甫金椀傾醍醐山東文豪尹大夫銀河赤岸通方壺

三山仙伯飄飄俱端明殿老爭搏扶子乃奔軼攀其鬚
明月在天不可呼掇拾墮黑雲模糊三台北斗韓尚書
芙蓉旌旗駐飛車低挽鳳凰追鯨魚高舉麒麟起玉除
定不遺子鮫人珠宜春宣曲驂皇輿尚書許我能起予
飛黃一向拋蟾蜍不識尊意今何如四十有六垂桑榆
西湖寒雪參清娛飛瓊硨磲波文麤卓玉稜嶒山骨癯
尚書尚書切勿疎我久寂歷西山隅尚書擊鼓羣龍趨
我豈不解吹笙竽青楓紅葉秋風初風聲獵獵搖江蒲

矯首河漢且長吁

與張安國園基勝者命題負者賦詩作藤枕歌

平生屈盤在空谷高韻清修疎節目上凌幽巖冠松頂
下入寒溪捫石足觀君眉宇含風霜豈肯展轉蛾眉牀
西齋一榻淨如水何如與我同臥起客子倦遊思故鄉
歸心往來鷗鷺行夢中山川不識路憑君推挽過西江

竹夫人歌

君不見黃金屋裏貯阿嬌咳唾隨風飛九霄寵極妬深

恩愛絕長門畢竟成蕭條又不見明妃千載居深苑年
年不識春風面一朝上馬出君門萬里關山紫臺遠來
來去去春空絲鶯鶯燕燕能幾時百年不辦專房計萬
事翻覆仍難期豈如道人青奴元不惡金蠶玉燕慵梳
掠眼眼相看似有情誰念佳人翠袖薄迢迢良夜款相
親玉牕冰簟夢無塵西風索索暫別去一歲一回重見
君重見君猶勝姮娥不嫁人

送空上人歸育王

生涯挑上古藤梢歸心飛渡鄞江潮長安貴人足官府
不似育玉山色高山前山後松風岑一衲無塵雙趺輕
月寒濯足半溪玉日淨穿林兩袖雲吾生浪走踰千里
天涯踏破青鞋底誰令插腳墮紅塵只恐愈深收不起
千載此山端有期翩翩清夢隨君飛他年拄杖叩泉石
莫認此翁作生客

贈僧師能

稽首十方大醫王乞我太素靈樞方無朱無墨無文章

不用桂朮參芝香亦非山澤川原良非丸非散仍非湯
勺撮銖兩何能量尋源不出羲農黃岐伯伊叟無交相
而況韓孟陳吳楊

韓保昇孟詵陳藏器吳普楊損之

一切靈府常含光

不屬心脾肝膽腸倏忽六猴窺六牕心花撩亂空飄颻
三界六趣橫顛狂六交十習紛踉蹌中此疾者何茫茫
爾出何策能相當此魔跋扈真強梁汗流盧扁走且僵
眼亂孫陶驚而蹌溫寒燥濕翻陰陽君臣佐使徒悵惶
我發刀匕非尋常應證取效無參商臨濟一擊雷橫撞

德山一喝龍騰驤荒郊解使枯骨強龍盤虎繞嬉迷藏
明月堂中啟秘囊一服甘露玻璃漿大千世界都清涼
此藥亟嚙不必嘗一粒中裹千金剛炮熅炙燂誰精詳
聽取露柱聲琅琅西泝江漢浮瀟湘呼將石人撐鐵航
藥囊拋向江中央長風落日雲蒼蒼

能精醫邂逅有奇功雖雜學禪門所

訶然挾醫養道猶有愈于其他也

贈南道人

露水班白未全白長江大湖喜為客西風漸少北風多

脚底路聲行格格一袍兩蹻都無餘腰間一二三葫蘆
生涯如此祇如此如此如此無他須紅黃瀰漫雜奔走
觀旁亦有可人否公卿將相總不問蓑衣鐵拐豈無有
青山綠水逢迎時亟來相報令吾知戴起一頂青蒲笠
拖將七尺紫藤枝因緣渺茫多阻隔斯人吾前亦不識
且吞溪玉濯心神更攬月輪摩眼力摩到無明醉夢醒
挹袖拍肩須有人

贈開懷道人

開懷道民以隻履為標榜鬻命資身其曠達妙趣有起人者

達磨隻履投西歸一隻迺為汝所持汝持此隻將奚為
十方三世包無遺大撓十千十二支衍作六十花參差
釋迦佛亦不出斯丈六身外還屬誰七十九年略可推
無始劫來何從知可滿盛著瑯琊兒任汝胎年月日時
烏窠披上麤繪衣龍尾引入黃金瑋平川袞野觀游絲
東西南北隨風飛水流雲在俱遲遲凡度眼者都忘機

卷十二
一物今古長光輝無頭無尾無骨皮無男無女無妾妻
無肝無膽無心脾大率一切皆無之太空赤立孤悽悽
珞珞忽見全如癡何況呂李楊徐奚我命居申西南維
我身在未正直西臘月三十日到來此身此命成煙霏
捲起卦盤收卦棊梅軒共看花陰移

雪山集卷十二

欽定四庫全書

雪山集卷十三

宋 王質 撰

五言律詩

何處難忘酒

何處難忘酒英雄太屈蟠時違聊置畚運至即登壇梁
甫吟聲若干將寶氣寒此時無一盞拍碎玉闌干

次蕪湖聞張彥船已行

陸路如蛙鈍江流似馬馳不嫌君去速只恨我來遲
兒女三杯酒溪山五字詩英豪到此地莫更問何時

蕪湖道中

擾擾千支水攢攢一簇村牛羊紛下括鵝鴨鬧爭門
晚徑颺松子秋田長稻孫霜天好風日壯士鐵衣溫

山行卽事二首

轉岸波仍急瀕溪路半無柳低侵樹腹蓮濕墜花鬚
田舍籬憂倒漁舟柁喜扶雨餘山更碧倍費我工夫

浮雲在空碧來往議陰晴荷雨洒衣濕蘋風吹袖清鵲
聲喧日出鷗性狎波平山色不言語喚醒三日醒

和御製詩五首

案此詩當是孝宗乾
道三四年間所作

某前日恭蒙樞密宣撫出示御製春日聖作名
儒巨公賡載之餘輒采其意之未盡者和成五
章寒遠不能以通帝所持詣鈞墀仰塵崇覽

列聖兼仁武隨時議戰和佇開新日月重照舊山河西
北浮雲斂東南王氣多大唐功十二一一付鐃歌

大慶通宣德西華近保和草荒朱雀道沙壅護龍河九
廟烟塵暗七陵風露多君王既神武父老莫悲歌

舊京宣德

門與大慶殿相值自西華門即入保和殿御路直朱雀門南薰門外則護龍河

濠楚前通泗舒廬內接和眼看花靨渡夢想白溝河火
德時方盛金行數不多儒臣且經略未要載賡歌

鼎待周公定羹須傳說和上方資羽翼誰解廢江河志
定功應就時來力不多晉公門下客豫製凱旋歌

景運開乾德昇平到政和七星搖帝座兩界隔天河義

士何曾少謀夫不在多鯉魚長尺半恐有扣牛歌

集杜子美句賦所居二首

田舍清江曲柴扉掃徑開
野花乾更落水鳥去仍回
渺渺春風見冥冥細雨來
幽棲身懶動坐穩興悠哉
野屋流寒水春星帶草堂
忘機對芳草駐屐近微香
農事空山裏柴門古道傍
眼前今古意看劍引盃長

郊居

不著烏紗帽自開青竹籬
鴈號殘月渚猿掛冷霜枝
有

淚不知落無心空自悲人情正翻覆去住總難期

秋興

有願投金粟無情上玉除
吾甘披短褐君自曳長裾
浥雲生屋涓涓水到渠
十難三四好八九在閒居

物幻詩

北海鯤從化南枝蟻戰勲
宋龜靈自困周蝶夢誰分
外物不可必此形何足云
勞生竟不覺幻境徒紛紛

次虞樞密九日登高韻

案此詩及挽楊參政詩當是乾道三四年間所作

風動旗千幹霜明甲萬聯愁邊悲有淚幽燧冷無煙殺
氣藏金鉞台光照玉船元豐韓相國故事講軍前

代虞相挽楊參政二首

特起西南紀孤飛五十年名登千佛頂位亞六階躔文
社尊韓伯經門事董先山川有冥會公在孝廉阡
道德平生足功名歲晚成掛冠方再表負杖忽三聲樂
壽兼仁智哀榮備死生我家無故老不忍見公傾

代李叔介挽楊參政

運泰風雲合名高泰華秋杓衡方北指江漢已東流寡
祐良臣死鍾情志士憂驚心波浪裏不見濟川舟

有感

北斗闌干外浮雲拄杖中天高千障立月靜一江空宇
宙橫揮塵乾坤落轉蓬浩歌聊舉酒無泪哭英雄

卽事

竹色交簷暗苔痕擁舍深羣麇無定響斷鴈有孤音戀
闕穿雙眼憂時折寸心中原既傳檄乃更有陳琳

送晁侍郎二首

案此詩當是乾道六年所作

元袞催韓覲，鏘鸞遲甫歸。
無功生靜福，有道正危機。
棄智輕觀世，忘言妙格非。
五車書滿腹，字字莫相違。

昔欲全家託，今惟隻影依。
任從龜左顧，獨自鵲南飛。
災淺謀三至，心危泣百揮。
英豪天下少，不敢廢依歸。

次青渠

市井雖聊爾，風光略勝他。
稻田方稍稍，瓦屋漸多多。
得路皆平地，逢山但淺坡。
日斜煙欲集，將奈晚寒何。

舟中作二首

昨日到今日滿江常湧波山川非不好風浪抑何多所
愧累公等固知如我何杞樓無晚照高臥一長歌

昨夜一葉落秋風江漢波晶晶紅日淡慘慘素烟多世
事今如此吾曹可若何淒涼聊繫棹一和大風歌

上王公明壽四首

案王公明名炎為四川宣撫使此詩當是乾道七年所作

緱氏吹簫遠王家奕葉光昔多稱建業今獨盛安陽泰
華何曾老江河各自長一名重兩火與宋大休祥

正統承周後元臣在鄴昌治平扶嗣聖乾作道興王指
日恢中土何時過故鄉新堂標畫錦門下有歐陽
稷契伊周後功名事業誰眼驚希世傑心喜太平時不
老池邊鳳長生印上龜旂常書不盡太廟有宗彝
風起雲飛志包含具善鄰試看公出手毋謂我無人揮
羽思平魏登場決并秦功成身莫退小駐八千春

采石道中

聞說前年事分明是偶然羣雄誇好手萬事有蒼天浪

沫埋椿木波聲撼戰船蕭條苦鬪者揮淚立江邊

魏城道中

岡背車痕亂崖陰馬足黏地爐茶帶苦幔店酒多甜水
減溪身瘦冰凝樹角銛衣篝都已盡無可更重添

青陽道中二首

今日青陽路行行不忍過人家茅屋少原野稻田多樹
木連蒼色陂塘湛碧波斜陽敲半嶺將奈鏡亭何

一路皆平坦今朝稍屈盤僕飢爭小店橋斷揀枯灘處

處山都好家家酒不酸人生各有地所樂是長安

宿石谿寺

落日寒山裏荒烟野寺中僧垣水衣白佛座蘚花紅舍
後蜂糖熟門前雁米豐夜長難早睡擁被聽松風

敕局同年相餞是日謝遣婢子春饒者還其家同

年大不然之共悵然也

案此詩當是乾
道七年所作

已恨此身多將如之子何自甘吾潦倒真恐汝蹉跎身
老便孤睡家貧喜自歌韜輶他日見各想舊婆娑

發家書

別乘非為辱江陵稍近家牙緋雖滯色頭白亦增華見
說堂前竹勝如屋角花脫身歸到得餘事總塵沙

上亭

雨色昏何在鈴聲怨阿誰一朝人世改萬事帝心知西
去身雖脫東邊勢更危祇應南內裏不似上亭時

雨花臺

亂草踏秋碧斜陽立晚紅天低昏海霧江闊渡惟風臺

有餘基壯碑無舊觀豐愁人惜倦眼不敢送歸鴻

見九華峯有四十餘其最秀者不知孰為九也因

作是詩

稍稍雲氣散溶溶山態回翠旌千丈立寶障百重開此地真堪老何時遂得來海中蛟蜃惡吾不問蓬萊

送虞丞相孫運幹詩三首

祖予尚閉戶

案集中有和通一簡虞祖予浣溪紗詞祖予蓋允文孫之字

景文當入

山未能黃綺外姑在尚彭間眼到風塵暗頭依樹石斑

曹溪有正路飛倦要知還

尚象子生子高風新又新昔看三檜戲今見一槐春父
祖有家法典型如老人傍觀應自肯自肯乃方親
曲肱真事業袖手大文章想子歸家急如吾捨世忙何
時見丞相幾日上瞿唐見問宜多說不言君亦忘

題東林姚貴高書屋

島嶼深沉碧溪花淡薄紅連山收宿雨當戶進涼風暮
靄孤村外斜陽一笛中西山起明月未放酒杯空

題洪景伯得江亭詩二首

眸子發孤照太空無阻修萬波爭赴海一嶂直當樓渺
渺憐身小茫茫覺世浮斜陽敲埤堦隨意數行舟

主去朝行在花留伴此亭別催心衮衮春攬思冥冥此
事須丘壑何人嗣典型但當添種竹相對北山青

題舫軒詩

一舸江湖外風濤有是非著身安實地冷眼看危機烟
樹何曾遠鷗羣故自飛若人能轉物滿載月明歸

題施大任雙桂軒詩

濯濯雙引幹盤盤同結根人知靈草木天與好兒孫
嫵媚花窺眼婆婆秀此軒門中福未艾遶樹更蘭孫

題孤山寺詩

窈窕孤山寺光明大士龕佛香時縹緲茶味亦清甘
竹挺森千百僧房並兩三全無兵火氣不似在淮南

和王充道夜坐二首

索索風呼葉蕭蕭雨打牕遙思雙白髮相對一殘缸
夢

落湘南浦身浮浙右江漏窮鐘未斷猶自咽微撞
風雨連三日晨昏共一牕天寒憐翠袖夜永對青缸有
泪揮吳月無船上楚江夢寒元易斷鐘靜不須撞

和孫仲甫

浦澈清溪遶人家綠樹圍竹墩森翠葆蓮蕩亂紅衣薄
雨生朝潤斜陽隱暮霏桃花流水意不在鱖魚肥

和姚明之

草色動秋綠松陰留晚清日烘蟬吻燥風助燕身輕蒼

莽家千里飄零酒一觥客愁銷不盡還與暮烟生

送陶茂安赴湖南二首

禮樂華今日江湖得此天繡衣開使指錦帳卷郎氈峻
嶽車帷外清湘蕩節前何如歸禁籞花柳自風烟

飄泊年家子依歸父執尊不知分此袂還更躡誰門欲
語無言訴相期有意存何時憑水檻涼夜倒清樽

送韓總二首

斗絕重關險星馳四牡駢斯朝三勞遣晝錦再光輝距

踊歡趨死權奇飽欲飛
羗兒還解事早送版圖歸
飄泊春餘絮孤寒歲晚松
誰知文有虎祗道士無龍
湓浦城相別蠶叢國再逢
論心能幾許山水又重重

送鄭德初歸吳中

相識雖非昔相知不似今
歲寒三益友金斷兩同心
半子來歸葉孤兒維事任
此間拈鼓笛那更有凡音

送清堅老人宰辰陽四首

黔郡隨山壤盧溪上水舟
雙眸長不夜兩鬢未全秋
製

錦寧傷手鳴琴自點頭
武陵花賞遍安穩上瀛洲

黔郡
盧溪

見九
域志

苦棟風方作桃花水未生
逢村宜早住
趁路莫宵行且

止青春酒頻添碧澗羹
槐根并馬骨切勿厭官清

青春
酒名

碧澗羹名見韓退
之杜子美詩云

卻背五城關旁連七寶山
楚臣經夕宿漢代入辰灣花

縣成陰了桃源覓路還
功名歸晚節矍鑠上清班

五城
七寶

楚臣漢代皆
見輿地記

穴出丹砂粒川呈暈角輝向來曾畫諾此去稍斜飛若
不吟紅藥還應對紫薇太公雖白髮西伯要同歸

挽李平仲二首

杳杳歸無極茫茫恨有餘九原那可作萬事總成虛汀
草何嘗歇雲山亦自如此回真定別無雁可傳書

窮達皆昨夢死生同一波幻身非我有薄俗奈渠何霜
樹柯莖少江湖洲渚多老來不禁淚未忍過懷坡

平仲有閭

曰懷坡

挽吳節夫二首

古道在今世今人離古心
延陵存一老元祐得遺音樂
善稻梁熟憂民江海深
二毛方五馬當代阻為霖
生死一大事聖賢三致思
朝聞應夕可春葉又秋枝
高眼世無比點頭人有誰
朔風吹槁野天地亦含悲

贈程元鼎二首

邂逅識程子牽連懷老坡
山林深自引琴劍肯來過
春事已如許客情將若何
舟行相風色江面水方波

杜宇正呼急程君來告辭自憐吾老矣敢問子何之起
柁指行在求官鳴有司歸來定何日秋事以為期

憶張安國

天上足官府舍人何處歸世情傷幻化道眼羨空飛易
合誰終始難言有是非九原如可作來共立斜暉

李南卿西歸求語以贈行山谷偈云八萬四千關
振子與君一箇鎖匙開僕亦有一箇鎖匙謹以奉
贈

之子何方去荆江上渚宮頗知君筆力能嗣我宗風境
熟拈來是心圓觸處通贈之一轉語收了萬年功

贈同省訪別

咳唾相聞地江湖各一天所思無物似此去有人憐身
遠何能近心寬自覺便難言知幾許回首意茫然

贈日者

何君巨源婺女人與范石史元卿有連其談五
行歷歷可聽自富川過蘄春將之武陵塵埃中

試求公卿當有雷霆一世者

自墮胞胎裏難逃造化中一毫皆有數三昧卽無窮消
息深深見機緘了了通君能希八九亦足問元功


詠蘆

高致想江湖當庭植小蘆清風時自至綠竹興何殊漑
灌情偏重琴尊賞不孤朗吟應有趣瀟灑十餘株

送胡秉彝歸毗陵

千林秋葉深此際有行人握手恨無語出門愁始新殷

勤一枝柳聚散百年身眺遠情何極茲來跡已陳



雪山集卷十三

欽定四庫全書

集部

雪山集卷十四至
六

詳校官庶吉士_臣龍廷槐

主事_臣呂雲棟覆勘

總校官檢討_臣何思鈞

校對官編修_臣戴聯奎

謄錄監生_臣姜澍

欽定四庫全書

雪山集卷十四

宋 王質 撰

七言律詩

西齋落成呈榮茂世

主人乞我短牕明推挽清風墮兩楹
千里坐安雙腳穩萬金難買一軒清
掃除舊念無遺恨收拾新工上短檠
幸有諸郎共料理緊催燈火赴功名

幽居

春附秋萼以時開
爾自野生吾懶栽
有飯故須間菰韭
無羹安用著鹽梅
雲蒼雲白變復變
雨舊雨今來不來
杉露松霜皆我酒
竹根木癭盡吾杯

秋夜讀書三首

不須薄澣少纖塵
時復閒行更脚輕
樹有涼聲常撼撼
燈無熱意但熒熒
土鬆瘦菜從頭長
地淨幽泓澈底清

月化日遷人不覺

見楞嚴豈惟月
化兼又日遷

卻于草木見先驚

見蘇

忽發十方一刹現渾銀

見圖覺經心花
發明照十方刹

秀野亭觀雪

不見湘娥十二鬟誰移白髮上青山雲開上界珠宮闕
風墮游仙玉佩環洄曲城孤千騎入山陰興盡一簑還
萬松嶺下寒溪口遙想梅花露半斑

從陳阜卿遊翠巖

馬輕人健有秋容飛到千巖萬壑中古殿含風寒佛骨
峻屏揭水注龍宮行深野屨霑空翠睡醒僧簷轉晚紅

彈指山川變光景橫江旌吹擁元戎

和張安國聞捷

兩京喬木久秋風甘露棠梨非漢宮
鐵鳳雕零周廟古玉魚流落漢陵空
朝催戰鼓雲埋陣夜發戈船月照蓬
宣德樓前清御道明年元會納羣工

渡湖過大浩寺

亂莎茁茁水皴皴紅葉黃花各自春
隔竹歌呼知叟醉倚松疎嬾見僧
真有時柏子捎衣落無數松枝刺眼頻

山頂斜陽纔慘淡，草顛多露已橫陳。

和李平仲出郊

渡頭脆柳不堪攀，嶺背彫楓尚見斑。
店小青旗低拂馬，寺荒蒼蘚暗封關。
但知魚樂如吾樂，未必僧閒似我閒。
忽憶去年今日處，楚山欲盡見秦山。

張元亮見訪留和坐客

杯盤倉卒但隨家，所賴龍山得孟嘉。
畧以詩聲知律呂，敢于學海望津涯。
精神霜後千頭橘，風味新時一顆瓜。

髮白未應餘子識，汗青當有後人誇。

晚泊東流

案方回瀛奎律髓載此詩以來流道中為題

山高樹多日出遲，食時霧露且霏霏。
馬蹄已踏兩郵舍，人家漸開雙竹扉。
冬青匝路野蜂亂，蕎麥滿園山鵲飛。
明朝大江送吾去，萬里天風吹客衣。

江西道中

落日平西樹起煙，亂山缺處水連天。
城樓突兀樓雲表，樹影參差落眼前。
倒引歸心纏客病，欲隨飛鳥渡平川。

不辭繭足投微徑慰藉征行有晚蟬

林溪中阻風

扁舟西去苦匆匆底事天回拖尾風
倉卒未應旗轉脚慙慙聊借浦棲鴻
半山烟雨駸駸暗兩岸霜林故故紅
得意輕帆休笑我去來等是一孤蓬

代虞樞密宴晁制置口號二首

合奏元和鼓吹聲旌幢交映兩轅門
中臺上相官儀重大國諸侯禮數尊
一會星辰朝北極八方風雨聚西坤

今朝賓主周旋地千古英豪氣象昏

陳雷膠漆自平生申甫藩宣共此行夷則黃鍾相律呂
南箕北斗對高明蛟螭鱗甲搖千纛虎豹牙須立萬兵
千載難逢今日會一盃且為故人傾

和虞相喜雪二首

縞夜寒輝花雨天灑空飛羽箭離峯普開蒼藹諸天供
大展兜羅萬里綿見在十方惟此佛後來千古說今年
乾坤正賴君調理未用輕尋范蠡船

禹跡茫茫海會同有誰管領自西東側身江漢歸無所
開眼乾坤見有公隱几三思籌去住歷階再拜叩窮通
朝家有意尋幽側人在風烟慘淡中

題山亭

馬喜名山去不停半鞭馳度兩峯青飛來山鳥能言語
老去江梅尚典型溪女半扉撩倦客野僧三肅上孤亭
百灘流水蒼烟上倚盡斜陽且更聽

題蘄倅烟霏亭

落木寒聲晚更悲斜陽隱隱霧霏霏並塘官路青莎合
帶郭人家綠樹圍莫遣風霜驚雁字從教烟雨潤鳬衣
接羅吹動肩樓聳却下脩篁徑裏歸

題張君量恩波寺

恩波全似海波深聊傍支流築小亭下映南山千丈影
上通雲漢一河星濠梁此日堪同樂文沼何時共効靈
人意亦隨魚意好一觥相對萬荷青

寄題挹翠樓詩

胸中磊砢但江山翠積靈臺挹不乾拂子折時無點滴
杖頭轉處湧波瀾收回晚照千巖靜放出靈光萬壑寒
我欲登樓聊舉眼乾坤雖大不能寬

張安國為朱黃二豪作傳索賦詩

二豪名字遍人間未許癡兒見一斑俯仰半生雙鬢禿
是非千古寸心關向來蹤跡埋空谷老去文章滿道山
我有詩書三十乘肯來相伴小牕閒

余過荊州張安國已請祠先行

心事何曾吐一分鼓嚴早已報三聲元戎十乘公先啟
野渡孤舟我自橫細看好山須少駐緩搖柔櫓莫多鳴
倘能黃鶴樓前見安得春江尾柁行

趙景山程德紹視早有詩成編

相隨騎尾紫游韁各佩牛腰古錦囊過眼風烟都領略
聚頭燈火更平章鵲枝賦罷驕橫架蚓鼎聯成倦倚牆
三讀軒渠仍伎癢亦撩草夢到池塘

送陶茂安知永州

弓刀陌上起征塵行到瀟湘春已深
柳子文章親到眼
魏公池館故沾襟
莫生去魯遲遲想且慰歌廉望望心
瀧水浯溪江不隔肯憑鯉尾寄佳音

觀政堂成上黃少譽二首

胸中道德五千文
聊借高堂發妙音
背倚飛樓懷古意
面臨止水正人心
新荷此際敷青葉
穉柳他年貯綠陰
但使厨烟無太遠
時來分座伴孤斟

潁州丞相舊能名
傳到雲孫尚典型
月在澄潭心共白

山園宴坐眼同青暫離方丈羣仙侶獨抱黃庭一卷經
十頃玻璃能幾許看公擊水渡南溟

題邕希孟靜室

綠玉珊珊密映門雙扉不受一絲塵經函藥鼎元無用
茗椀熏爐總是真坐閱百年俱幻境肯懸一榻貯閒身
塵毛揮罷無人語靜看冰壺一點春

送鈕子明

大夫離別莫心酸痛飲長歌作壯顏勿羨春江燒赤壁

須從夜磧度陰山精神勃鬱雙眉上功業輪囷十指間
看罷吳鉤騰上馬臨分小試出三關

老人嘗饌北食兒女輩不能過蕪湖多魚且美僕
生長澤國不可一日無此

不得揚州蟹蛤嘗江鄉魚味亦相當自從南渡為生理
漸見東人說故鄉出火麥團猶雪白帶漿米飯更爲黃

老人日日惟須此長笑兒郎太楚儉

借韻

含山寺

一僧龐眉拄杖扶自汲石泉澆茗盂山深松樹鬚髯古
寺老木魚鱗甲枯心閒逢人謝禮樂身倦到枕即江湖
夢回石壁半斜照蝙蝠打人山鳥呼

送王仲鈴口號

華屋沈沈燕不譁綠陰悄悄樹含花旌旗照野元戎壯
禮樂充庭使者華解袂莫辭雙玉酒同班行待五雲車
金虬度徹陽關曲佳月隨人未肯斜

送胡正仲二首

萬安松檟已參天
屬眼昆仍故
宛然榮尹堂
前周兩紀
甘王樓下跨三年
八風翻海如如定
一月當空在在圓
太極清都天尺五
拖牙換轉去翩翩

稍稍秋風吹客衣
浮雲斜照送將歸
搖開楚岸蟬方急
行到吳江雁已飛
直恐相思衣帶緩
無令問訊驛書稀
一牛鳴地難傾倒
何況山川道路違

和陳阜卿

雨花臺下晚江秋
曾對斜陽倒玉舟
自斷我當歸弔屈

不應君亦未封留異時兵裏同悲喜今日樽前再勸酬
悵望佳人雲幕合空遺別恨與湯休

送酒與胡倅

青堅堂下出香泉歷歷春聲到耳邊卷起白波滋舌本
養成黃氣舞胎仙帝觴他日分涓滴家釀今朝養聖賢
飲罷鈴條應已製汝陽乘此去朝天

送劉子開二首

帝恩無吏肯承宣雨露滂沱貯半天璀璨兩星同拱所

蕭梢一驥獨當先驅馳足下千重繭忠孝心頭一寸田
孺子亭前見三雋為言秋事亦茫然

塵中拈出玉光明追琢多年老更精會使低頭降志士
無令抵掌笑書生此行原野霜風急所過溪湖潦水平
鴻雁同天不同侶為傳好在與南卿

送王充老歸盱江

風遣輕蒲趣去程滿江秋月碧紛紛相看斷雁情何極
同著征衫袂更分千里固應俱對月一樽安得再論文

從今竹枕蓬牕夢不夢懸刀只夢君

送李公

海內堂堂見此公孤高不與萬夫同身行宇宙東西遍
心徹乾坤表裏通莫共林泉謀老境更看彝鼎篆新功
君王拊髀休長嘆亦有英豪在眼中

送趙子真送藏經于朝廷

憶昔同遊金鳳臺臨高望遠思悠哉重來又作燕山別
不意翻為驛馬催寶藏元輝天上去塞塵秋色鬢邊來

歸期已定終年約莫遣丹心一寸灰

別張君玉二首

烟霜江漢雁南飛鸚鵡洲前再拜辭
風勁周郎焚艦日
月明庾老上樓時
無言只共江聲語
有意惟憑山色知
他日中原公事了
磨崖千丈要豐碑

白雲黃鶴會相逢
湖北江南故楚宮
拭目文章王八座
叩頭勲業趙三公
今朝側耳聽奇偉
何日投身佐事功
公到京師相記憶
蘆花江上竹竿風

謝王巽澤新火

月落參橫剝啄聲起驚新火到陳人鬢隨周燿年年改
心共商盤日日新祠甑飯香增意氣草堂燈影換精神

侯家宮蠟晴烟起公自他時作好春

老杜云朝來新火起晴烟是改火以

晨韓翃云日暮漢宮傳蠟燭是改火以晚蓋改火當以節候今寅初得清明則以曉頒適其宜也足見處事雖細微必周盡故荀反之

謝范西叔惠詩

世間無可似君詩
兔杵聲寒露脚飛
領下驪珠能奪取

袖中滄海更攜歸久荒此事成疎懶賴有斯人為發揮
佳處不隨車馬得但扶古堞看斜暉

贈徐輝

五曜循環十二宮乾坤盡落往來中竹羅書在人安在
姑射山空道不空疇昔未能知本末從今不復問窮通
東樓恣享湖山樂三尺闌千萬里風

贈湯元亨

湯子親攜寶鑑囊路開春草見王郎只今萍梗栖湓浦

金步山人集卷十四
疇昔松楸在建康數轉話端纔歷歷一生身世不茫茫
從今點破心間事獨對東風笑一場

贈鄧東

青藜半夜放光明王字金文下太清舉眼試看君行略
點頭會盡我平生運行勝景丁居丑歲建昌期乙遇庚
四十五年如夢過尚堪晚景見昇平

贈劉遂良

二年不下竹匡牀枕損茅齋小米囊吹起江風渡劉子

踏開荒草見王郎胡灣此際談三命肥水何時戰一場
他日中原公事了與君同話此荒涼

和李粹伯

不多風雨已秋容慘澹斜陽濕晚紅長憶蘋風過歸雁
更思烟浪拍垂虹未應堂上燭能滅所願樽中酒不空
卷雪樓前卸帆日却從天際望吳中

又和李粹伯

雲似諸公簿領閒不名阿堵但江山秋風未白平生髮

尊酒聊賴壯士顏醉後參虛無咫尺悲來天地總間關
歸眠夢繞瀟湘野紅葉黃花滿望斑

問王稚川覓酒

麥天一似菊花秋澀雨癡風故作愁幸自從來公不飲
何如乞與我銷憂膠膠擾擾誰能問兀兀陶陶得即休
七澤五湖烟水闊可容閒夢到滄洲

次通守韻題和政堂

攬天高柳意堂堂柳外山長水亦長百尺冰壺清徹底

一川雲錦爛生光暫看屬玉搖波影速駕麒麟入帝鄉
宣曲宜春驂輦路上林風味薄沙棠

上林賦沙棠櫟櫨
呂氏春秋果之美

者沙棠
之實

和郭子應二首

子應以詩見遺有將分之語
愴甚因用前韻少叙此懷

出門吹面已薰風春在垂楊慘淡中我輩不須悲聚散
此江元自有西東日暄波暖魚苗出雨潤泥融燕領豐
尚可淹留成一醉引盃說劍未輸公

北牕睡起復西牕心事悠悠付枕囊日靜無人驚燕雀

野青隨意卧牛羊愁中故自傷遊子別後還應憶漫郎
萬里梅邊尋斗米夫君身世亦遑遑

和張君玉

且把鋤頭且著書懶隨臣朔怖侏儒車腸久自思懷橘
蓬首還應念執艾未暇洞天尋小有盡將世界付南無
不知南北東西後肯寄書來問老夫

和張君玉與史喬年

弩天先驅導繡衣芙蓉倒影動旌旗行歸容與螭頭陞

且去摩挲峴首碑
吳帝城邊逢此日
越王樓上憶他時
相煩問訊隆中陌
尚有當年草木知

和張君玉

使星卿月共光輝
行轉杓衡入紫微
白粲萬檣軍總飽
紅稠千榦馬能飛
後身叔子今安得
萬代夷吾古亦希
風動一江吹晚雪
歲云暮矣送將歸

和沈述之贈權幹詩

江楓不敵寸心丹
何待霜雄更自寒
滿眼空空無一佛

曉勢分子瞻木山詩序先君子得木山三峯詩云蓬
婆雪嶺巧雕鏤林開命訣云地上三奇甲戌庚戌云

次韻姚貴聰

小簾低捲一庵春茗椀薰爐作意新今日共懽何事酒
他年定託不孤鄰愁腸繚繞終難展醉字橫斜半失真
遙望江流橫日脚極思沙嘴問歸津

次通守韻題廓齋

遙傳碧落入新除早向清都卜定居金勒鳴珂班退後
玉堂揮翰酒醒餘試聽掣動鈴條響驚看飛來錦帕舒

甘露堂前正秋色集賢如堵望相如

銀山寺和宗禪師四季詩

春

但聽清圓不覺喧松牀紙帳坦便便草深雉子爭烘日
樹煖蜂鷁懶起烟無事石頭頻打睡有時村店暫逃禪
尋花問柳山前後隱隱鐘聲暮已傳

夏

繞廊行聽鐸丁當禾稻桑麻各一鄉竹影能令心灑落

溪聲自與意清涼
門無驚鹿衝籬破
路有疎螢掠草光
纔到斜陽生暮靄
滿庭山露滴松香

秋

塵埃飛不到郊垌
山鹿溪魚任意行
密逕竹烟迷暮影
幽巖松露滴秋聲
燒殘野草爛斑黑
脫盡疎林隱約明
溪石稜稜波激激
水花紅紫謝還生

冬

夾徑長松耐凜冬
隨溪覓路杳無窮
曉霜易滑荆橋上

朔雪難侵紙帳中溪冷無魚供酒客林荒有鹿伴樵翁
江湖水濶多蘆葦不異飄鴻泊野風

答楊教見和

飯鼓逢逢睡起時先生弟子總開扉不妨堂下輕騎馬
切莫江頭浪典衣且對燈花隨雨落任從苜蓿列盤稀
杜陵鄭老襟期在今昨那能定是非

挽趙處士

叩閣凜凜疏三通歸社蕭蕭酒一鍾龍卧高陽呼不醒

鵬飛北海去無蹤無年及見安車召有子能荒大國封
想見功名心未死亦隨江漢去朝宗

弔法空

鶴不勝癯汝更癯平沙獨立未為孤雨花臺上方知有
明月堂中竟省無此夜吟風憑北固何時乘月叩西湖

出頭已解挑包走試路西江問老夫

空在建康雨花臺方尋詩忽有省始

棄去從妙喜參禪妙喜甚恨其障深也見空來即曰拽
出死屍著蓋以屍為詩提撕刮擊力矣空竟坐詩為魔
參請少倦即尋溪陟山不覺又發諸吟哦妙喜屢歎其
形太脆數不長此事恐難成未幾瘦死今二十年矣埋

丹徒南陂有母尚存其乞貲曹勣云一夢江湖已十春
芒鞋不踐馬頭塵只知今日了今日豈料一身愁一身
南阮固應慙北阮越人那得累秦人西風不但吹
游子吹老天涯白髮親效唐人體非空本法也

雪山集卷十四

欽定四庫全書

雪山集卷十五

宋 王質 撰

五言排律

挽虞丞相

一德風雲會千秋海嶽靈中涵天度量外峙玉儀形人
物如三代文章似六經嘉謀調藥石偉望振雷霆二水
盤明鏡三嵎揭秀屏天心開俊傑世路化畦町采石交

造化管不得要開時便開洗天風雨夜春色滿銀臺

團扇歌

鸞背如花女出自咸陽宮不愁無主愛惟怕見秋風

竹夫人二首

夫人承主愛不在鴛鴦幃庭楓飄一葉滿眼貯秋悲
洞房暗薰結誰作雙蝴蝶夫人獨自夢清露泣寒月

七言絕句

上虞相行春口號十首

賓從行間錦作團
相公馬上玉為山
今朝除却西湖好
天下無春似此間

馳上平岡小打圍
相公自控紫絲韉
一鞭揮出三千騎
驚動流紅窸窣飛

蝶整鶯齊不亂飛
好風吹雨上花啼
和寧門外沙如雪
且向江堤試馬蹄

團紅碎綠冒絲飛
不敢輕輕觸袞衣
正欲辭春春未許
且教留待相公歸

暖霧昏雲養麥天春風引綠去綿綿種成百萬軍民飽
忠孝心頭一寸田

浪穀高張碧四垂游絲欲下不能低斜陽却恐花成睡
只在天邊未肯西

雲空玉宇降重重匣面雙蟠小戲龍夾路繁花香到骨
不如天上紫芝封

近日屢有
宸翰之賜

暗黃退柳綠厭厭長與行人駐別筵傳說歸朝天下雨
不如休繫相公船

嬌風悄悄日晶晶只見花光不見塵行過津頭旗轉脚

萬波吹動碧鱗鱗

是日微風過
浮橋始大作

遙指吳天背蜀雲峽波小綠作微皺西州寒食清明了
猶見檀心上苑春

效竹枝體有感四首

來時梅花繞路旁祇今壓枝梅子黃回思孤徑踏斜月
冉冉馬頭迎曉香

石橋直下槩雙橫落葉漸低湖水生歸心欲寄潮頭去

潮頭不肯過湓城

斜風急雨暮瀟瀟
更與客懷增寂寥
樹頭梅子未全熟
莫來牕下打芭蕉

江南烟雨梅子肥
稻針刺水青離離
江南風物亦如此
所恨情懷非昔時

即事

桃李陰陰子滿枝
春心密意兩忘機
無何一點流鶯過
驚動楊花簌簌飛

夜泊荻港二首

落日人家已半扉，隔籬問答語聲微。
桑枝亞路蟬爭噪，一似南村割稻歸。

野火參差度暗光，蕭蕭蒲稗自生涼。
夜深雲上無星斗，古樹陰沈覺許長。

次虞樞密九日登高韻

滿擬重陽醉菊觴，花時多已過重陽。
年來莫是無知己，未遇淵明不肯香。

問王稚川借其父承可詩二首

侍郎墓櫬已蒼蒼萬古江河一錦囊杜老平生憐驥子

不將衣鉢付他郎

集中有憐幼子詩謂稚川也

百代風流集豫章娟娟各自作時妝誰知索虎鉤鯨手
傳到黃家便到王

夜坐起贈范西叔何子方

濃淡雲中月吐吞寒枝驚葉動烏蹲青燐一點無人對
賴有西風為掩門

為道陽關有故人

沈德遠少卿與某同登不見今八年時領毗陵也

寶溪同社兩齊年一落江湖一上天試問吾兄應好在

何時再拜玉階前

沈子壽編修與楚輔皆文溪為命今子壽尚棲遲子壽于某長一月某命

亦文溪也

故以兄稱

卷雪樓前欲放船滄浪亭上且扶肩他時一月同千里

江漢吳淞共拍天

贈畫工

我無頭上進賢冠祇帶儒生一味酸願向筆端求弱笠

桃花春水把漁竿

寄峽石老人

白沙渡口見鬚眉
袖角槎牙出好詩
願得揚舡秋水去
共看明月墮琉璃

題大浩寺

漫山竹樹結清深
古殿荒寒一兩燈
但有菜根隨粥飯
老夫請作住持僧

題真如寺詩

舊紅新綠都如許塵世何曾有定春
晚渡野航衝雨去
今朝佳處總吾人

月下看古碑唐正元間物也

泥土相纏四百年摩挲十在九彫殘
明朝叉手東西去
更有誰人月下看

題李白笠釣圖

龍子梅粧釣笠前脫鞵豪氣總蕭然
一絲來往茫茫碧
不記開元後幾年

題竇伯山小隱詩六首

栗里柴桑事事無，但言吾亦愛吾廬。
掃開秋草門前路，恐有觀潮訪後湖。

深衣緇緣古風標，不用橫飛上九臯。
且伴寒泉薦秋菊，水仙王亦是吾曹。

蒲稗蒹葭密擁門，無風亦自有秋聲。
烟塵齊魯今何在，下雒陽新有兩生。

山澹雲濃間有無數牛，鳴外接匡廬。
甘樓亦有鷗夷老。

左右盆山即五湖

瘦水微皺漸復槽
秋楓脫葉下江皋
王楊盧駱青冥上
不廢江河廢爾曹

秋草空繁不識名
秋蒲雖脫尚能聲
君行愛護青鞵底
行到山空恐路生

題薛公肅西湖問梅圖二首

茅屋荒寒篝影昏
口心相應共花論
山橋野渡香凌亂
君在江南我劍門

人眼心花總不昏
細從烟外月中論
孤山疎影橫斜處
今有珠樓鎖翠門

舟中題石母洞前潭中玉犀石

玉犀玉犀是何物
白玉鱗蹄水晶骨
珠宮貝闕不勝寒
夜來走出蛟龍窟

黃制幹坐上題墨竹扇

自有清風風不吹
雖無明月月相隨
此君不可無一日
奈有霜寒露冷時

和黃少譽綠萼梅

綠毛么鳳仰銜花不在山椒即水涯
昔日鬢邊能似此
春愁磨盡總成華

問查元章覓龍團茶詩

戲龍頓斷天門鎖
來蟄公家片段箱
恐有墮髯收不盡
覓來驚起雁鳬行

用前韻謝元章惠茶二首

五夜輕行過故鄉
不知箭栝與車箱
清風一點吹靈府

夢斷江南白鷺行

白日騰騰睡醉鄉
塵絲撩亂冒巾箱
從今易趁繡書課
滿眼精神下五行

和袁丞蓋嶺長松三首

強名呼作大夫官
亘古摩空不免冠
但惜五封遭一點
寧如深嶺撼風寒

露邊穉葉亦堪餐
霜後皴皮更可冠
撫此盤旋不憂晚
但憂栗里酒樽寒

百灘飛度半雲端
波浪聲雄不濕冠
緗袖垂鞭徐進馬
市塵無此雪風寒

和李無變與諸公出郊訪王彥博

病來無力勝鞍馬
不得蘭亭共一觴
射雉如臯猶不笑
散花方丈錦千張

和李無變求詩

十年慘淡經營處
一點青熒燈火知
平日詩從天外得
只今天外總無詩

和秋日即事韻二首

駸駸山蒼雜水紅不如冷眼看秋風北鴻已望江南起

飛過榆林月正中

蕭琦云燕人喜射鴈鴈南嚮多夜度

初楓葉外數行飛瘦竹竿頭一點鵲浮世危機總如此
青蛇飛處且相隨

千葉梅

一枝獨立衆芳先小翠長紅一任妍縞袂仙人來閱世
向來手眼故千千

新竹

我不疎君君自疎此君於我定何如
中庭明月常常在
卷地風來不掃除

合歡扇

明月雖圓有缺時
合歡安有百年期
故令六六深宮女
淚落君前自不知

九華扇

玉斧修成玉兔宮
蕭蕭無日不秋風
九華紫翠騰空起

取次拈來在掌中

紗扇

八字回環字字精一規孤月半銖輕只應來自鮫人室

風動猶聞細浪聲

簡文帝紗扇銘
照月空光耀發風霜

黃鵠扇

摩盡青雲到紫微玉城風露冷霏霏政令同落生綃上
亦勝空梁一燕飛

竹扇二首

脫盡龍兒錦繡衣一枝變化作千絲冷然不受人間暑
誰道清風有歇時

老龍飛去葛家陂尚有龍兒戲錦衣只恐世塵吹不盡
世塵吹盡聽龍歸

白羽扇二首

昔卧隆中今渭湄真龍長御快風飛出關吹碎兒郎膽
安用軍師更指揮

鼎足三雄各立時卧龍騰起向西飛渭川波盡搖明月

金
卷十五
百萬貔貅聽指揮

七寶扇

七寶薰開萬竅風
靈犀一點與天通
婆娑吹動紅爐雪
總在清涼世界中

六角扇二首

一自昭陵掩閔都
龍跳虎卧世間疎
如今縱有千金璧
不博當年十字書

昔日蘭亭暢惠風
至今不與庶人同
百金五字都休問

修竹清湍在眼中

蒲葵扇

輕蒲獵獵野風吹上蟾宮白玉樓想見東山紅粉裏
超然惟有此風流

道經

或云道家無經旨五千言而已故作詩以吐之

端拱主人無語句臺輿僕隸鬧喧闐希聲絕想忘言處
海水墨山書不全

雪山集卷十五

欽定四庫全書

雪山集卷十六

宋 王質 撰

詩餘

相見歡

薄霜

霜花零落全稀不成飛寒水溶溶漾漾軟琉璃
紅未

湧青已露白都晞

案此下原
本缺四字

沙暖戲鳬鷺

長相思

暮春

紅疎疎紫疎疎可惜飄零著地鋪春殘心轉孤鶯相
呼燕相呼樓下斜楊遮得鳥倚欄人已無

前調

漁父

山青青水青青兩岸瀟瀟蘆荻林水深村又深風冷
泠露泠泠一葉扁舟深處橫垂楊鷗不驚

生查子

見梅花

見汝小溪灣修竹連疎影林杪動風聲驚下甃甃粉
見汝大江郊高浪搖枯本飛雪密封枝直到斜陽醒

楊柳枝

淡月

慣得嬌雲趕不開去還來淡光無可照樓臺且停杯
薄雨疎疎時幾點灑浮埃賣花未上擔兒擡聽他催

浣溪紗

和王通一韻簡虞祖予

何藥能醫腸九回榴蓮不似蜀當歸却簪征帽解戎衣
淚下猿聲巴峽裏眼荒鷗磧楚江涯夢魂只傍故人
飛

又

夢到江南夢却回夢歸何處得身歸故溪淥淨看鳬衣
下到瞿唐春欲杪桃花香浪渺無涯三台回望五雲

飛

又

征雁年來得幾回春風無雁帶書歸故應春瘦減春衣
花柳傷心經歲月江湖無夢失津涯到家無樹不紅
飛

前調

有感

細雨蕭蕭變作秋晚風楊柳冷颼颼無言有淚灑西樓
眼共雲山昏慘慘心隨烟水去悠悠一蓑一笠任孤
舟

清平樂

感懷

江沙帶濕莎露和烟泣落日欲低紅未入悄悄暮峰凝
立疎林秀色荒寒頻頻駐騎回看應是梧桐影下秋
風颭碎眉山

又

斷橋流水香滿扶疎裏忽見一枝明眼底人在山腰水
尾梨花應夢紛紛征鴻叫斷行雲不見綠毛么鳳一
方明月中庭

前調

梅影

從來清瘦更被春僝僽瘦得花身無可有莫放隔簾風
透一枝相映孤燈燈明不似花明細看橫斜影下如
聞溪水泠泠

眼兒媚

送別

雨潤梨花雪未乾，猶自有春寒。不如且住清明，寒食數日之間。想君行盡嘉陵水，我已下江南。相看萬里，時須片紙，各報平安。

西江月

借江梅蠟梅為意壽董守

月斧修成膩玉，風斤琢碎輕冰。主人無那壽杯深。倩取花來喚醒。舞罷繡裯鳳，蹙飲闌畫閣香凝。試將花蕊數層層。猶比長年不盡。泣梅

又

輕蠟細凝蜂蜜薄羅深壓鵝黃玉容縱不似他郎也在
百花頭上試看眉間一點全如瓶裏孤芳明年此日
趁鴛行記取今朝勝賞

梅蠟

前調

和王道一韻促畫屏

蹙蹙紅中烟潤梢梢翠尾風斜閒軒幽樹少啼鴉此處
最宜君畫望眼不知天濶歸心常恨天遮見君江浦
到蘆花意在琵琶亭下

軒外有石榴芭蕉壁
間有所畫江浦蘆鴈

前調

感懷

壁水橋邊此客金鑾坡上何人沙塲老馬事無成淚濕
青瑩夾鏡袖手烟霏小景回頭石嶺空城乾坤遺恨
渺難平目斷塞鴻孤影

滴滴金

晚眺

陰陰濕霧霜無汁江氣逼樹聲滴荒林只見夕陽入誰
喚晚烟集漁翁猶把釣竿執蓑共笠時時葦風剛浪
猛早收拾天外莫雲黑

燕歸梁

送別

卷十六
拂拂春風入馬蹄駐綠楊堤綠柳堤上乳鶯啼聲聲怨
怨春歸而今一似花流水蹤跡任東西利成名遂在
何時早贏得兩分飛

青門引

尋梅

尋遍江南麓只有斑斑野菊梅花不遇我心悲一枝得
見便是一年足微香來自橫岡竹飛度寒溪曲落路
尋人借問謝他指向深深谷

鷓鴣天

山行

空響蕭蕭似見呼溪昏樹暗覺神孤微茫山路纔通足
行到山深路亦無尋草淺揀林疎雖疎無奈野藤粗
春衫不管藤撈碎可惜教花著地鋪

前調

詠漁父

一隻船兒任意飛眼前不管是和非魚兒得了渾閒事
未得魚兒未肯歸全似懶又如痴遮些快活有誰知
華堂只見燈花好不見波平月上時

一斛珠

十一月十日知郡宴吳府判坐中賦海棠

風流太守未春先試回春手天寒修竹斜陽後翠袖中
間忽有人紅袖天香國色濃如酒且教青女休憊
梅花元是羣花首細細商量只怕梅花瘦

前調

桃園賞雪

寒江凝碧是誰翦作梨花出花心猶帶江痕濕輕注香
腮却是桃花色飛來飛去何曾密疎疎全似新相識
橫吹小弄梅花笛看你飄零不似江南客

前調

有寄

平塘玉立薄羅飛起層層碧人心不似花心密待要相逢未必相逢得
襪塵不動何曾濕芙蓉橋上曾相識
櫓聲搖去江聲急西北高樓回首浮雲隔

怨春郎

宿池口

蘆花已老蓼花已老江腹衝風山頭殘照暮烟不辨栖
鷗識歸舟
歸舟照顧新洲閣驚波惡別揀深灣泊南
津北灤水村總沒人家莽平沙

虞美人

卽事

綠陰夾岸人家住橋上人來去行舟遠遠喚相磨全似
孤烟斜日出閭門浪花拂拂侵沙嘴直到垂楊底吳
江雖有晚潮回未比合江亭下水如飛

前調

李敦文席上

翠陰融盡毵毵雪慘澹花明減嫩沙拂拂漲痕添想見
故溪綠到草堂前夕陽紅透櫻桃粒掩映深沈碧成
都事事似江南只是香衾兩處受春寒

臨江仙

和徐守聖可

縹緲清霄雲一握太清羣玉光中鈞天聲裏拂香風紫
皇低接手穩步上層空 雀扇徐開鸞影轉日高舞動
蛟龍雙瞻御座立昭容回班趨複道環珮響丁東

又

千頃翠圍遮綠淨菱花影落波中看看紅錦漾清風此
時催入覲烟浪拍雲空 佇見觚稜棲寶爵旌旗全仗
飛龍赭黃一點現真容御麻宣未畢雲鏡上天東

前調

宴向守簇

曲水流觴修禊事祓除洗盡春愁舉樽再拜壽君侯只
今虛鼎足好去作班頭自古相門還出相春旗小駐
南州雲孫將紹祖風流他時如見憶江漢一漁舟

前調

南樓席上壽張守

八字山頭來較晚彩雲未散南樓夕陽千丈映簾鉤君
侯如欲老江水莫教流扇底清歌塵不動胡牀明月
清秋天漿為浪玉為舟酒闌君便起歸去立班頭

定風波

夜賞海棠

曲曲闌干曲曲池萬紅繚繞錦相圍花到黃昏思欲睡
休睡眼前多是好相知銀燭轉添花轉好人在花深
深處更相宜似此好花須愛惜休惜鬢邊消得兩三枝

前調

贈將

問訊山東竇長卿蒼蒼雲外且垂綸流水落花都莫問
等取榆林沙月靜邊塵江面不如盃面濶卷起五湖
烟浪入清樽醉倒投牀君且睡卻怕挑燈看劍忽傷神
又

白壁黃金爵上卿紫宸殿下拜絲綸纔出龍門開虎帳但
看甲光如水夜無塵 古古今今男子事搖動芙蓉旗
影入金樽到得關河公事了早去白雲堆裏養精神

蘇幕遮

守倅移厨

孟夏上澣使君通守不以荒寒肯臨老杜所謂
盡日淹留佳客坐百年粗糲腐儒餐者也兩辭
極道湖山雲月之趣因以記相與之意云

水風輕吹不皺上下浮光兩鏡光相就雲錦搖香吹散

酒細聽清談玉屑津津嗽 明月前斜陽後竹露秋聲
拂拂寒生袖掇取湖山聊入手紫閣黃扉到了終須有

前調

送張刪定赴台

驛塵飛天意緊香雪芝封猶帶吳泥潤昨夜寶奩開玉
鏡一點西風便覺寒秋近 白蘋洲紅蓼徑風露淒清
快促黃金鐙疊疊重重聽好信擲了碧油幢更擲雙堂
印

前調

聞鷓鴣啼

眼將穿腸欲裂聲聲似向春風說春色飄零自是人間
客不成淚都成血朝朝暮暮何曾歇叫徹斜陽又見
空山月

又

夜茫茫春寂寂含烟叫裂空山石吸盡東風化作垂紅
滴漏將闌情轉極月明繞樹聲聲急無數閒花盡染
啼痕濕

青玉案

木樨

中央自有仙風度散入千林去萬點秋芳洒飛露舜裳
赭色堯眉黃彩化作花無數層層翠葆鸞旗舞吹下
天香遍瑤宇萬歲千秋奉明主桂華月苑蕊珠寶殿長
聽黃金縷

前調

池亭

浮萍不礙魚行路細數魚來去靜倚溪陰深覓句碧鮮
清潤影搖香度易覺闌干暮鳬鷖深傍蘋根住浴罷
紅衣褪殘縷一寸江湖無可付渚蘭汀草卧烟歌雨荒

了垂綸處

江城子

席上賦

細風微揭碧鱗鱗繡帷深不聞聲時見推簾籠袖玉輕
輕不似綺樓高捲幔相指點總分明斜灣叢柳暗陰
陰且消停莫催行只恨夕陽雖好近黃昏得到釵梁容
略住無分做小蜻蜓

又

細風吹起翠田田雨和烟入梅天鮮潤繁陰悄悄轉清

圓十頃蒲萄深貯碧鷗共鷺各翩翩
影搖香度小嬋娟
竹林賢總神仙
滴露飛霜雲壑注
冰泉伴了芙蓉城
裏容無一事北牕眠

前調

宴守倅

柳梢無雪受風吹
綠垂垂乳鴉啼
直下蒲萄春水未平
堤卻似今年春氣早
白團扇已相宜
紅巾當日烏銜
飛曲江湄
暮春時孔雀麒麟交
蹙繡羅衣何似野堂陪
勝客花影外竹陰移

驀山溪

詠茶

枯林荒陌矮樹敷鮮葉不見雅風標十二分山容野色
因何嫩茁舞動小旗槍梅花後杏花前色味香三絕
含光隱耀塵土埋豪傑試看大粗疎爭知變寒雲飛雪
休說休說世只兩名花芍藥相牡丹王未盡人間舌

滿江紅

幕府諸公郊外同集以病不去

方丈維摩蒙衲被都齊不省空悵望錦裘繡帽玉珂金
鐙十月小春逢此日一時勝事輸公等問短衣匹馬射

南山何人肯 山暮紫峰如筍
江寒碧沙如粉望塞鴻
杳杳水遙天永飲罷不妨瓶屢卧
歸来自有風吹醒試
斷橋流水月明邊尋疎影

前調 慶壽

整頓乾坤恨舞袖回旋不足須付與腰金
疊赤面槐參
綠功業豈無人可了英豪自有心相伏
自孤牕寒燭聽
經綸常三復 舉大白傾醺醪為公起歌
此曲曲中意
惟有斯賢堪屬草
喜除煩惱障蓮華妙享清涼福願

年年團扇弄生綃長如玉

前調

春日

慘淡輕陰都養就朱朱白白最好是梨花帶雨海棠映
日暖霧烘成芳草色嬌風分與垂楊力聽紅邊翠杪轉
清圓曾相識春緒亂還如織春夢斷還堪覓看青梅
下時有遊人嘖嘖愛酒正香須滿泛憐花太嫩休輕摘
把領巾收聚衆香濃憑風立

又

生穀平鋪吹不起輕風無力西江上斗牛相射水天一
色二妙風流今代少一時光價何時息更絳霄白日下
雲駟芙蓉客整飛馭成得得尋前約寬憶憶正雲飛
雨卷舊紅新碧茁茁抽長荷柄綠甕甕吐淨楊花白漸
衣篝香潤入楊天紅綃濕

前調

漁舟

莽莽雲平都不辨近山遠水儘徘徊尚留波面未歸灣
尾浪猛深深鷗抱穩波寒縮縮魚沈底恐狂風顛雨岸

都摧舟難艤 船篷重拖不起蓑衣濕森如洗想杖頭
未足盃中無計漁網吹翻無把捉釣竿凍斷成拋棄到
高歌風靜月明時誰如你

前調

牧童

落盡斜陽尚有些斷霞殘影甚灣環東溪西巷南巖北
嶺行熟更教羊引著睡濃却被鴉驚醒漸孤村樹暗顫
山歌霜風冷 人世裏嫌他蠢牛背上輸他穩但芒屨
一綳蓑衣一領五臟荒坡蔬薦口雙髻幽崦花漫頂雖

雲烏月黑路蒙籠何曾窘

前調

聽琴

紙帳梅花有叢桂又有脩竹是何聲雪飄遠渚泉鳴幽
谷紅蓼白蘋須拂袖餘音尚帶清香馥挽素娥青女問
飛瓊誰家曲 韓退之歐永叔惓兮恍恍兮惓試側耳
山常似黛水常如玉顏子操中何足怨醉翁嶽外無人
續正青天明月上東南芳時足

水調歌頭

京口

江水去無極無地有青天怒濤洶湧卷浪成雪蔽長川
一望揚州蒼莽隱見烟竿雙矗何處捲珠簾落日瓜洲
渡鴻鷺滿風前古戰場皆白草更蒼烟清平猶有遺
恨久矣在江邊北固山前三傑遙想當年意氣疊疊眠
中原上馬促歸去風墮接羅翩

前調

中秋飲南樓呈范宣撫

細數十年夢十處過中秋今年清夢還在黃鶴舊樓頭
老子箇中不淺此會天教重見今古一南樓星漢淡無

色玉鏡倚空浮 帶秦烟紫楚霧熨江流關河離合南
北依舊照清愁想見姮娥冷笑我歸來霜鬢空敝黑
貂裘把酒問清影肯去伴滄洲

前調

遊銀山寺和壁間張安國作

晚嶂倚斜日秋樹戰悲風一泓紺紫澄碧中有睡蛟龍
散作清溪明玉激上長松流水雨電亂寒空拋却紅塵
袂飛入妙光宮 佛國大天溥博地含洪空巖亂壑遞
響珠影動金容萬古碧潭空界一點青霄明月滂漉總

無功雲散殿突兀風動鐸丁東

又

草蔓已多露松竹總含風羣山左顧右盼如虎更如龍
時見魚燈三兩知在誰家浦淑星斗爛垂空萬有付一
掃人世等天宮 秋蕭瑟林脫葉水歸洪江湖飄泊鴻
雁洲渚肯相容要使羣生安堵不聽三更吠犬此則是
奇功一任畫麟閣吾自老牆東

前調

九日

雲巘在空碧天宇共高明重陽易得風雨今日不勝晴
天為兩朝元老付與四時佳節不動一絲塵香霽洗金
戟飛霧洒霓旌山鳴葉江動石總懽聲劍關玉壘千
載誰見此昇平細看樽前萬態相映眉間一點黃氣鬱
駸駸江漢下淮海都賴一長城

前調

饒風嶺上見梅

花上插蒼碧花下走清湍濃霜深覆殘雪更有月相參
似我竹溪茅屋欲曉未明天氣扶杖繞籬看秦楚五千

里何處是江南 饒風下人不斷馬相連頗嘗見有此
客相屬意惓惓欲為橫吹出塞無處可尋羌管短策叩
征鞍策斷征鞍裂驚墮玉旄旄

前調

壽查郎中

淮海一星出分野到梁州玉京羣帝朝斗公在列仙流
盡掃攬槍格澤高拱紫微太乙霞佩拂紅稠非霧非烟
裏永侍紺雲裘 日南至月既望壽君侯梅花滿眼一
朶聊當一千秋半夜玉堂承詔翼旦路朝宣冊歸去作

班頭風淨瞿唐峽安穩放行舟

前調 慶壽

河漢湛秋碧玉露暖瑤空太清仙子飄渺飛佩響玲瓏
暫馭青鸞紫鳳來玩十洲三島旌旆捲芙蓉身在大江
表名繫絳霄宮兩仙客歌駐月舞迴風寶薰輕度簾
幙香霧結重重已覺長安近日會看北星朝斗千載慶
雲龍翠靄彤烟裏長侍袞衣紅

八聲甘州

懷張安國

海茫茫天北與天南吾友定安歸聞濡須江上皖公山
下駕白雲飛莽蒼空郊虛野古路立斜暉顏跖皆塵土
苦淚休揮 一代錦腸繡肺想英魂皎皎健口霏霏望

寒空明月無路寄相思嘆千古興亡成敗滿乾坤遺恨

有誰知今何在一川烟慘萬壑風悲

安國死後在淮南
屢降過冥作詩詞

偈頌及結字比生前愈奇偉
淮寧宰陸同得遺墨尤多

前調 讀周公瑾傳

事茫茫赤壁半帆風四海忽三分想蒼烟金虎碧雲銅

爵恨滿乾坤鬱鬱秣陵王氣傳到第三孫風虎雲龍會
自有其人 朱顏二十有四正錦帷秋夢玉帳春聲望
吳江楚漢明月伴英魂汜汜小橋紅浪濕撫虛絃何處
得郎聞雪堂老千年一瞬再擊空明

前調

讀諸葛武侯傳

過隆中桑柘倚斜陽禾黍戰悲風世若無徐庶更無龐
統沈了英雄本計東荆西益觀變取奇功轉盡青天粟
無路能通 他日雜耕渭上忽一星飛墮萬事成空使

一曹三馬雲雨動蛟龍看璀璨出師一表照乾坤牛斗
氣常衝千年後錦城相弔遇草堂翁

前調

讀謝安石傳

氣佳哉烟紫石頭城雲碧雨花臺想東山前後望春樹
綠看晚潮回自古英雄豪傑無不待時來擁鼻微吟處
山靜花開商皓亦嘗如此羨蒼生皆有瞻望之懷但
肥河洛澗此事偶然諧疑是彼八公草木得神明相亮
不相猜西州淚千年猶濕回望興哀

倦尋芳

試墨

冰壺秋月去了潘郎傳到梁老騎馬乘船麾斥五湖三
島任梢雲兼拂日拽蛟龍鱗鬣都推倒向塵中分付高
人勝士把雲烟掃乾坤巧自蒼筠無汗烏錐無刃此
為至寶第一君門通表書囊諫草第二文章揚事業第
三編簡據懷抱千百般終久被他磨了

前調

渡口酒家

斷崖樹老側岸槎枯倒倚斜插脚面淺溪掌樣平洲重

疊著芒屨攜竹杖遇亂莎幽澗縈紆涉那人家有竹筍
瓦缶頗頗清冽 曾微呻正斜陽淡淡暮靄昏昏晚風
獵獵轉眼已成陳迹不堪追躡試問舊醅還好否在暫停
歸影留時霎待重來細拈弄水花山葉

萬年歡

有感

一輪明月古人心萬年更寸心存滄海化為黃土心不
成塵杳杳興亡成敗滿乾坤未見知音撫闌干欲喚英
魂沈沈又没人應 無聊歌枕搔首夢廬中壇上一似

平生共挽長江為酒相對同傾不覺霜風敲竹睡覺來
海與愁深拂袖去塞北河西紅塵陌上尋人

真珠簾

栽竹

翠虬天矯擎蒼玉飛來到吾廬溪灣山麓一笑忽相逢
更解包投宿北池之畔西牆曲與主人呼青吸綠恨我
無天寒翠袖共倚脩竹每遇飛雪蕭蕭更驚風撼撼
清標可掬更與月同來無半點塵俗冬有寒梅閒相伴
春亦有幽蘭相逐香足纔露下飛霜又有秋菊

沁園春

閨居

二百年間十二時中悲歡往來但蓋頭一把容身方丈
無多緣飾莫遣塵埃屈曲成幽蕭條生淨野草閒花都
妙哉家無力雖然咫尺強作縈回竹齋向背松齋須
次第春蘭秋菊開在竹籬稀處密栽柑橘橋斜畔疎
種香梅山芋芼羹地黃釀粥冬後春前皆可栽門通水
荷汀蓼渚足可徘徊

紅窻怨

送邵倅

欲寄意都無有且須折贈市橋官柳看君著上征衣也
尋思榜舟楚江口 此會未知何時又恨男兒不長相
守苟富貴無相忘若相忘有如此酒

前調

卽事

簾不捲人難見縹緲歌聲暗隨香轉記與三五少年在
杭州曾聽得幾遍 唱到生綃白團扇晚涼初桐陰滿
院待要圖入丹青奈無緣識如花面

鳳時春

見殘梅

標格風流前輩纔瞥見春風蕭然無對只有月娥心不
退依舊斷橋橫在流水 我亦共月娥同意肯將情移
在麝紅俗翠除丁香薔薇酴醾外便做花王不是此輩

泛蘭舟

譙天授畫像

蕭蕭烏帽黃衫烟水拍雲岩風清月白一雙碧眼瑩秋
潭四海九州茫茫東北渺渺西南松霜杉露毵毵龍
門隔如參井青城佳氣與天參蔽山充野牡丹紅外
茯苓甘鶴頂凝丹隙駒蹀躞儘百年間乾坤雲海風颿

譙名

定涪陵人受道于伊川後棄鄉里隱河
洛復歸蜀居青城之老人村至今尚存

無月不登樓

種花

池塘生春草夢中共水仙相識細撥冰綃低沈玉骨攪
動一池寒碧吹盡楊花糝氈消白卻有青錢點點如積
漸成翠亭亭如立漢女江妃入奩室擘破靚粧擁出
夜月明前夕陽散後清妙世間標格中貯瓊瑤汁才嚼
破露飛霜泣何益未轉眼度秋風成陳迹

別素質

請浙江僧嗣宗住庵

一箇茅庵三間七架兩畔更添兩厦倒坐雙亭平分扶
闌兩下門前數十丘穠樛塍外更百十株桑柘一溪活
水長流餘波及蔬畦菜把便是招提與蘭若時抄疏
鄉園看經村社隨分斗米相酬鍰錢相謝便闕少亦堪
借借常收此筍乾蕨鮓好年歲更無兵無火快活殺也

雪山集卷十六